

NAMIBIA SENIOR SECONDARY CERTIFICATE

FIRST LANGUAGE OSHIKWANYAMA ORDINARY LEVEL

4105/1

PAPER 1 Reading and Directed Writing

2 hours 30 minutes

Marks 70

2020

Additional Materials: Answer Book

INSTRUCTIONS AND INFORMATION TO CANDIDATES

- Write your answers in the Answer Book provided.
- Write your Centre Number, Candidate Number and Name in the spaces on the Answer Book.
- Write in dark blue or black pen.
- Do not use correction fluid.
- Answer **all** questions.
- Pay attention to spelling, punctuation and sentence structure.
- The number of marks is given in brackets [] at the end of each question or part question.

OMALOMBWELO NOMAUYELELE KOVAHONGWA

- Nyola omanyamukulo oye mEmbo IOmanyamukulo olo wa pewa.
- Nyola Onomola yOsenda, Onomola yEkonakono nEdina loye kEmbo loye IOmanyamukulo.
- Nyola nopena imbulau ile ilaula.
- Ino longifa okadimifo komeva.
- Nyamukula omapulo **aeshe**.
- Kotokela esipelo loitya, elongifonawa loileshifo netungo lomatumbulo.
- Omwaalu waitwa owa yandjwa moikondekifombine [] konima yepulo keshe ile yoshitukulwa shepulo.

This document consists of **6** printed pages and **2** blank pages.



Republic of Namibia

MINISTRY OF EDUCATION, ARTS AND CULTURE

OSHITUKULWA SHA-A

Lesha nawa okaleshwa taka shikula, ndele to nyamukula omapulo taa ka pulwa.

Okaleshwa 1

Otundi yaxuunina

“Otundi yaxuunina” oya ningilwa moshitukulwa shaFransa mu-Alsace Lorraine, konima eshi France a findwa moita kovakwaita Ovaprussia, ovapopi velaka IOshindowishi moita yaFranco-Prussia momudo 1870-1871. Ehokololo eli ola shangwa ku-Alphonse Daudet nola xupipikwa ngaha.

Ongula yefiku olo onda ya kofikola nda tokelwa nonda li ndi na outile, unene tuu kombinga yomuhongi wetu, omushamane Hamel, eshi a tile kutya ote ke tu pula kombinga yeemhango delaka IOshifransa omo ndihe shi nande oshitya shimwe. Okwa li handi diladila okufaduka po, ndi ka hondame moixwa. Okwa li kwa pupyala omutenya wetokopya. Oudila okwa li tava sheketa mokule ve li komiti odo di li komunghulo womufitu, omanga pehalandjadja konima yofabulika yoipilangi ku na ovakwaita Ovaprussia tava delela. Nonande kanda li ndi na ohokwe yokushanga okakonakono keshiivolaka, onda kwata omhedi koluvinga, ndele handi endebele ndi ye kofikola, opo ndi ke ka shange.

Eshi handi piti pongulu yoyoongalele modoolopa, opa li ongudu inene ya ngudumana komesho yoshipelende shomaueyelele. Konima yomido mbali da ka pita, eenghundana detu adishe dii, opo hadi tulikwa opo, ngaashi, okufindwa momalwoodi, omusholondodo wovanyasha ovamati ovo tava wainifwa keenghono metanga lovakwaita nosho yo omalombwelomhango a dja kondjai yoita. Noinandi fikama po, onde lipula ame handi ende nda yuka komesho, “oupyakadi washike mbela u li po paife”?

Mokweendelela kwange eshi handi piti po handi ningi omanha male nda yuka kofikola, omuhambwidi Wachter, oo a humbata oilongomwa yaye, nota lesa ouyelele oo wa li wa tulikwa opo, okwa ifana nge ndele ta ti: “Ino endelela kamatyona, ou na natango efimbo la wana oku ka fika kofikola, ino tokelwa”. Onda li ndi shi ota ningi nge omashendjo, naashi nda ka fika pokakunino komuhongi Hamel pofikola, onda li handi hefaana keloloko.

Alushe hoveloleetundi dofikola, eweelelo ohali udikila kokule, tali di meyeululo nepato loitaafula, meetundi da pandeka oshita, nohatu kala twa pakaleka omatwi, opo tu ude ko nawa, ashike nena ope na okafilukenyenye. Okwa li ndi na etimaumbwile, opo ndi hange eweelelo olo hali kala po alushe, opo omuhongi Hamel eshi ta ka endaenda motundi ta denge emutendifo laye koshitaafula, olo hali ningi eweelelo, ame ngeno ohandi livakele mo inandi monika, ashike monena mofikola omu na okafilukenyenye ngongula yOshoondaxa. Eshi nda talela mekende longulu yofikola, onda mona ovahongwa vakwetu ve li nale omutumba peenhele davo nomuhongi Hamel ta endaenda, ashike ka li e na oshitendifo shaye shitolifi, osho hashi kala alushe monghwapa, nonde litungila ouumbo kutya kape na omhito imwe, ondi na ashike okuyeulula omuvelo nokuya mongulu, omo keshe umwe e li nale omutumba ponhele yaye. Diladila nee nhumbi kwa li nda fya ohoni nonda tila, shaashi inandi fika pefimbo.

Mokuya motundi omuhongi Hamel okwa mona nge, ndele ta popi newi litalala ta ti: “Endelela u ye poshipundi shoye kamatyona, Franz. Otwa li tu na okutameka otundi uhe po” noinandi pewa ehandukilo lasha.

Onda tauluka oshipundi, ndele handi kala omutumba koshitaafula shange. Fiyo opapa okwa li ngaho ndi na okaumbada kanini eshi nda mona omuhongi wetu a djala ondjafa yaye itwima omafo, ohema yomapulaela nokakootili kalaula taka taima. Aishe oya li ya hondjelwa eengala noiha i djalwa ashike oshimha, kakele mefiku letalelo ile meyandjo lomapapa.

Kakele kwaasho, onghalo yofikola oya li i lili notai limbilike, naashi sha kumwifa nge unene okumona oipundi yokonima oyo hai kala alushe i li hamwasha, ku na ovanamukunda ve li omutumba mengungumano ngaashi fyee. Omukulupe Hauser, a djala embale laye lohuke -nhatu, Mayola mukulu, Omukulunhu wopoosa mukulu novakwashiwana ve lili noku lili. Keshe umwe okwa li ta monika ehe na ombili. Omukulupe Hauser, okwa li a etelela embo likulu le itonya komungenge e li tenheka keengolo daye la pandjulwa, la tenekwa omakende manene pokati. Manga kwa li handi lipula kombinga yoinima aishe oyo, omuhongi Hamel okwa londa koshipundi shaye nokwa popya newi lombili ngaashi e shi ningilile nge petameko, ndele ta ti: “Vamwange, ei otai ka kala otundi yange yaxuunina kunye. Otwa pewa elombwelomhango la dja ku-Berlin, opo ku hongwe ashike melaka IOshindowishi meefikola domoshitukulwa sha- Alsace Lorraine. Omuhongi welaka IOshindowishi ota tameke okuhonga mongula. Hano ei oyo otundi yaxuunina yOshifransa. Onda hala mu pwilikine nelitulemo.”

Onghundana ei okwa li ya denga nge pomutima. Oh! Oshi udifa nai shili. Mboli oyo onghundana ya li ya tulikwa koshipelende shomauyelele pongulu yoyoongalele modoolopa.

Oh! Tashi ti ei oyo otundi yange yaxuunina yelaka IOshifransa, omolwashike mbela? Ondi na oudjuu woku shi shanga, paife itandi shi lihongo vali, ndele nee onde lietela onghenda eshi kwa li inandi litula mo motundi yange yOshifransa, ponhele yaasho onda kala handi ka konga omai oudila noku ka danena omeva moshana pefimbo lokufu. Omambo oo kwa li ndi wete haa ningile nge nai nale, a li madjuu okuhumbata, eshiivo leemhango delaka nokuhelitulamo kwange meetundi, paife oyo ookaume kange vakulu ovo inandi hala okweefa po. Nomuhongi Hamel oo naye ta fiye po ofikola yetu noitandi ke mu mona vali, osha ninga nge ndi dimbwe kombinga yemutendifo laye nomikalo daye dii dokungwadjaula ovahongwa.

Onghenda inene! Nani eshi a djala oikutu yokongeleka okwa hala okufimaneka otundi yaye yaxuunina yOshifransa. Paife ondi udite ko nee kutya omolwashike ovashamane vomomukunda ve li omutumba konima mongulu yofikola. Okwa li ve udite nai kutya navo itava mono vali omhito yokushiiva elaka IOshifransa. Osha li omukalo wavo wokupandula omuhongi omulineekelwa oo a diinina oilonga yaye oule weedula omilongo nee da ka pita nokuulika efinaneko koshilongo osho shihe li vali melelo lavo.

1 Nyamukula omapulo 1 (a) fiyo (c) mokushanga ondada oyo tai tu kumwe nenyamukulo lomondjila. Oshihopaenenwa (a) A

(a) Emakelo lilipi la tukuluka muFranz, opo a diladile okuhaya kofikola?

- A okukonga oudila momufitu
- B okudelela novakwaita
- C eshiivolaka IOshifransa
- D okuhondama moixwa

[1]

(b) Okaleshwa otaka yandje etumwalaka leudonai lovanhu eshi ...

- A omuhongifikola a lundulilwa kofikola imwe.
- B ounona itava ka dula vali okuya kofikola.
- C ounona itava ka dula vali okulihonga elaka.
- D omukunda owa tilifwa kehanauno.

[1]

(c) Efatululo lilipi lomoule tali yandje elityo loshitumbula “edengo pomutima” she likwatelela kokaleshwa aka?

- A okuhafifa
- B okutaima
- C okuningila nai
- D okukanghwa

[1]

- (d) Pakaleshwa omaweelelo elipipo oo Franz a li a teelela okuuda mokufika pofikola mefiku olo? Yandja oitwa **itatu**. [3]
- (e) Omuhongi Hamel eshi a tameka okupopya, oshike Franz a didilika kombinga yetumwalaka olo la li koshipelende shomauyelele? Yandja oitwa **ivali**. [2]
- (f) Elunduluko lilipi Franz a didilika momalihumbato omuhongi Hamel efiku olo? Yandja oitwa **ivali**. [2]
- [10]

2 Ngeno oove nee wa li Franz mokaleshwa omo. Paife eshi wa kula, talulula nee kutya oshikalimo shokaleshwa aka oshe ku honga shike mefiku olo la hokololwa. Shanga oartikela oyo tai ka holoka moshifo koshi yoshipalanyole "**Ombedi onaukelo**", to longifa ouyelele wa dja mokaleshwa u ete po omadiladilo oye paunghulungu.

Oule woartikela yoye nau kale pokati koitya **200 - 250**. [20]

OSHITUKULWA SHA-B

Lesha nawa okaleshwa taka shikula apa ndele to nyamukula omapulo taa ka pulwa.

Okaleshwa 2

Odila yonghuva ye lidongelela okafa kayo

Onda pendulwa kekweni lovili, oyo i li pomunghulo wombete monduda yange yokunangala, oyo handi futile alushe kexulilo lomwedi. Onda li nda fya eemhofi neweelelo eli ola li tali ningile nge nai! Onda tokola ndi i dime, opo ndi kofe po ouminute ovo ve li ko. Konima yefimbo onda pashula omesho ange ndele handi tale moshihokohoko shonduda yange. Ame mwene onda wana ngaho okukala omuhongwanhu? Ile pamwe ohandi i ashike keetundi koshiputudilo shopombada nda panda oipopiwa yovaprofesoli? Onda li nde limwenena handi lipula momwenyo kutya, otashi dulika shi kale shiwa okuya koshikunino, ndi ka palwife oolunghima, ovo hava hangika monhele omo. Oolunghima ove na emanguluko, ohava i vo tave uya ngaashi va hala nefimbo lavo. Eudeko lavo ola yooloka neenghono kwaalo lovanhu. Oufaule owa li tau nane omadiladilo ange, ashike onde a denga po meendelelo. Kakwa li vali ndi na ehalo lokukanifa otundi ikwao.

Onde litwa omukumo ndi penduke ndele handi linyowaekele mokalikoshelo, ndele handi di mo, shaashi inandi hala okumonika. Onda lya oshuumbululwa meendelelo nonde lilongekida okuya komakanghameno eebesa. Ondjato yange yomambo ofikola okwa li i li poshitaafula, opo nde i fiile onghela. Inandi i kuma, oi li ngaashi nde i fiile po onghela noinandi lilongekidila eetundi ngaashi handi ningi shito.

Eshi nda ya pondje, onda didilika kutya, odula otai nyanyangele. Eulu oli na oilemo ya didimika, omindudumo nomaluvadi okwa li taa shela. Onda endelela ndi shune monduda, ndele handi vakula okanduda kange. Onde lipopila momwenyo kutya, odula onghwashike tai loko muAprili. Onde lididimikila odula, ndele handi i nondjila yange nda yuka komakanghameno eebesa. Eshi nda fika po, oipala yovatwaalelwa otai ulike ihe udite ombili, shaashi obesa oya tokelwa ngaashi hashi holoka omalupita. Etokelo lobesa eli ohali kala elao kwaame.

Elao linene onda fika pefimbo lotundi yange yOikwaliko mOunamapya. Omuprofesoli wetu woshihongwa shOikwaliko mOunamapya Gurmail Singh, omunandunge nomuyandjimaye muwa. Onghenda inene, omalihumbato etu kakwa li taa tu kumwe naasho kwa li a timaumbwila.

Omuprofesoli ou iha faula ile a tokelwe okufika kotundi, ashike efiku olo ina fika pefimbo. Vahapu vomovanafikola vakwetu ovo hava patelwa pondje shito molwokufika va tokelwa, okwa li ve lipandula, omanga vamwe vomovahongwa inave shi hafela. Omuprofesoli eshi e uya motundi konima yokafimbo kakwa li naanaa ta ulike e li momhepo iwa ngaashi shito. Keshe umwe oku shi liwetele, ashike ita ulike a handuka ile a handukifwa. Oshipala shaye itashi limemesha ngoshito. Otu udite kutya ope na sha sha puka. Kashiimba omalihumbato etu okwa ninga eetundi daye di djuupale. Omuprofesoli omunambili, omunalukeno, nomunamutimanghenda okwa tameka otundi yaye nokushiivifa kutya ei otai kala otundi yaye yaxuunina.

Okwa tameka te tu pe ombili kooumwe nooumwe a fa e wete oye e na epuko loku tu dopifa. Okwa li twa mana mo omesho, ndele katu shi kutya ohatu tale peni naapo hatu holeke oipala yetu. Otwa li twe lifya ounye. Eshiiwifo laye ola li la nyanyaula omitima detu ongo da tetaulwa keongamukonda. Otwa kwatwa koutalala, ndele nohonde momalutu etu oya fa itai kunguluka vali nawa notwa dengwa pedu. Kasha li shipu okuholeka eudonai letu. Otwa li tu shi shi kutya fye ongovanafikola otwa ponya meemhangela detu.

Konima yokumwena po kanini, okwa ya koshipelende ndele ta shange ko oshipalanyole shefiku kombinga yengushuluko loimaliwa, ndele ta tameke otundi yaye yaxuunina, oyo kwa li ya hongwa nawa kuhe na vali.

Okwa alukila konghalo yaye yoshito ta longo noupenda nonouladi. Otundi okwe i hongwa noupu nonelitulemo, e tu fiya monghumwe ngaashi shito. Ngepakumo leisho otundi ya fika pexulilo, okwe tu lekela noku tu halela omholo monakwiiwa yetu, ndele ta piti mo nelimweneneno. Okwa li tu udite ongunga notwa fya ohoni eshi twa xulifa po eifano noilonga yaye pamukalo mwii.

Okwa li twe mu hokwa monanguwi notwe mu fimaneka. Otu shi shi kutya otwe mu ninga nai notu na oku mu mbilipaleka. Natu ongele oimaliwa, ndele hatu mu landele omaano? Pamwe ohatu mu landele embo lipe olo la nyanyangidwa xuunina loikwaliko mounamapya okuulika olupandu, molwounongo waye oo e tu pa. Ahowe otashi dulika ite shi tambula ko, shaashi oku shi shi kutya vahapu vomufye otu na oudjuu okutambula ko owino wopetameko moshihongwa shoikwaliko mounamapya. Okakalata kekelo? Olo kali shi ediladilo lii, ashike otaka ka kala kanini okutula mo omadiladilo nomaliudo etu atushe. Konima yeenghundafana dile otwa hanga eudafanotwokumwe, opo tu mu nyolele ombilive yelekelo. Shaashi okwa li nda konekwa kutya ondi na ohokwe inene muye, onda pulwa ndi mu shangele ombapila. Osha li oshinakuwanifwa shidjuu, osho kwa li handi diladila. Konima yefimbo onda ka kala omutumba aame andike mongulumambo nda shanga po ashike oshitya "Omufimanekwa".

(Sha xupipikwa okudja Spice of life by Chitvan Singh Dhillon The Hindustan Times, 12 May 2015)

- 3** Ngonga omafaafano omaukwatya nomaliudo ovahokololi ngaashi a hololwa mouleshwa ava **vavali**.

Oule wengongo loye nau kale pokati koitya **200 – 250**.

[20]

- 4** Ngeno oove wa li omuhokololi wehokololo eli, twikila okushanga ombilive yelekelo yomuprofesoli weni. Longifa ouyelele wa dja mokaleshwa to u eta po paunghulungu nopamadiladilo oye mwene.

Oule wombilive yoye nau kale pokati koitya **200 – 250**.

[20]

BLANK PAGE

BLANK PAGE

